

**Laporan Audit 2010: PAS Kemuka Petisyen Kepada Agong  
mStar Online**

**Oktober 31, 2011**

**Oleh SUSAN ALBERT KASSIM**

**KUALA LUMPUR:** PAS akan mengemukakan satu petisyen kepada Majlis Raja-Raja dan Yang di-Pertuan Agong berhubung salah urus kewangan negara seperti didedahkan dalam Laporan Ketua Audit Negara 2010.

Naib Presiden PAS, Datuk Mahfuz Omar berkata, petisyen itu merupakan suara bantahan rakyat yang akan dikumpul melalui satu laman web yang akan dilancarkan dalam masa terdekat.

"Kita akan lancarkan petisyen menerusi internet dalam tempoh seminggu dua lagi.

"Kita akan kumpul nama-nama rakyat dan kemukakan kepada Yang di-Pertuan Agong," katanya pada sidang media di Parlimen, Isnin.

Mahfuz yang juga Ahli Parlimen Pokok Sena berkata, petisyen itu bertujuan untuk memaklumkan kepada Yang di-Pertuan Agong dan bagaimana Seri Paduka boleh bertindak atas bidang kuasa baginda untuk menasihatkan kerajaan.

"Audit ni macam buku laporan murid sekolah. Kalau tengok banyak merah tentu mak ayah kecewa. Samalah dengan rakyat yang kecewa dengan prestasi kerajaan dalam laporan audit itu.

"Sebab itu perlu ada satu tindakan dari Yang di-Pertuan Agong. Pendedahan ini sangat berat," katanya.

Beliau berkata, pendedahan dalam laporan audit itu menggambarkan kegagalan dan prestasi terburuk Perdana Menteri dalam menguruskan kewangan negara.

"Kalau dalam syarikat korporat, jika berlaku kerugian, CEO mesti bertanggungjawab dan perlu melepaskan jawatannya," ujarnya

Hakcipta Terpelihara © 1995-2011 Star Publications (Malaysia) Bhd

Source:

[http://mstar.com.my/berita/cerita.asp?file=/2011/10/31/mstar\\_berita/20111031154338&ec=mstar\\_berita](http://mstar.com.my/berita/cerita.asp?file=/2011/10/31/mstar_berita/20111031154338&ec=mstar_berita)